

NI RROP CART XTE SAN JUANY

1 ¹ Nare ni canabiia lo de saniroldilaazni Jesucrist, cacuáa cartré par laat ni abcubee Dios, laat ni areldilaazti Jesucrist. Nare guldípaca rcaaza laat ne gati naastia, sino que ziyza irate de ni azenuu xtiidx Dios. ² Nare rcaaza laat pur ni arbeznén xtiidx Dios ne laany izaate dxi arbeznény durni. ³ Xtadni Dios ne Llinny Jesucrist, laany gunldeeny quiat, ilaslaazny laat ne iguaadny laat guelnaldiulaaz pur ni zenuut xtiidxny ne rcaazti de saat.

⁴ Quesentiand rzaclaaza chi gucbiia dec nuu de saat ni guldípac zenuu xtiidx Dios, ax nabánydeb zec ni rnabee Xtadni Dios. ⁵ Anre zec ni rcaaza laat, irate de ni rac sáan, rguuin rnaaba lot ná par icaazni de sáan. Ne ni caniia laatqui, gati cubyti náni, lagac mandamient ni bindiagni desde guloni. ⁶ Guelrcaaz ná ibány bniety zec ni rnabee Dios, ne mandamient ni abindiagti desde gulo ná dec ná par ibányti cun guelrcaaz.

⁷ Te pur iranuzzi lo guichliu candza zienzi de ni run engany bniety, pur ni quit reldilaazdeb dec abeed Jesucrist lo guichliu zecac tuby bniety. Ne ni run ziy, enganiy cayunbi ne laazacbiy enemigu xte Crist.

⁸ Gulcualo laat te par quit initti ni ariáldti pur ni cayunti, sino que yalo icáat ni riáldti lo Dios.

⁹ Tutix ni icuaarupac quia zec ni bseed Crist bniety, laab quit rbeznétib Dios. Per elqui ni zenuu xtiidx Crist zectisy ni bseedny bniety, laab rbeznéb Dios ne Llinny. ¹⁰ Belati idziny ni idziny ruu lizti par iseedbi laat zec ni rlilob zenuub Dios ne quit nátini zec ni abseed Cristni bniety, ax quit cuutitbi yuu nicliza quit gúntit cuend ni rniib. ¹¹ Te pur ni run cuend xtiidxbi, niy zelo dec anáb cunformi cun de engany ni cayun bnietyqui.

¹² Zienziru ni napa iniia laat, per quit rcaaztia gúnay pur cart. Güenru dún zelee guedtixluaa laat par ininépaca laat te par izaclaazni tubylote.

¹³ De ni abcubee Dios, de saniroldilaazni Jesucrist ni rbez nezné, rguapdebdios laat. Amén.